



BOSANSKOPETROVAČKI VJESNIK

Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba



Glas Načelnika

Umjesto Glasa Načelnika ovaj put u ovom odjeljku dajem riječ sugrađanima, te prenosimo članak Adisa Nadarevića koji je objavljen na portalu Buka Magazin:

Zašto je općina Bosanski Petrovac vrijednija od deset sarajevskih općina Centar

I zato kad vas neko pita šta je to Bosanski Petrovac, recite da sam vam ja rek'o da je to malo ostrvo na zapadu Bosne i Hercegovine, ostrvo pametnih ljudi koje je periferno samo na mapi. Možda izgledamo kao periferija i provincija, ali ovo je centar vrijedniji od deset Centara.

Jest' da je to golema i parali općina ali nekako opet jedna na deset - deset na jednu, o zar se i to može...Nemojmo se lagati, pustimo šuplju, jedan parking-plac na potezu Vijećnica-Marijin Dvor je sarajevskom minderu vrijedniji od čitave Republike Srpske, a jedan poslovni prostor u Titovoj je tu negdje sa memorijalnim centrom u Potočarima.

Zato je općina Centar možda važnija od deset drugih općina, ali isto tako je po mojoj računici onda općina BOSANSKI PETROVAC vrijednija od deset općina Centar jer smo mi ovdje pokazali principe i vrijednosti u koje se treba ugledati čitava Bosna i Hercegovina.

Ovdje je nakon rata ostvaren povratak i Bošnjaka i Srba svojim domovima, znači da ovdje žive ljudi koji su se namjerno vratili da žive tamo gdje vole. Ovdje je i ostalo puno ljudi koji su svoj novi dom našli u Bosanskom Petrovcu i svi ti ljudi su stali zajedno, odbacili podjele i složno ponovo izabrali nestranačkog načelnika koji im je četiri godine davao od sebe sve što je mogao. Uz to je opet izabrano najšarenije općinsko vijeće sa 17 vijećnika iz 13 stranaka - pa ima li igdje više pluralizma nego u nas?

E zato je općina Bosanski Petrovac vrijednija od deset općina Centar. Ovdje se ljudi vraćaju da žive zajedno, ovdje se loše stvari ne mogu unijeti ni sa strane, ovdje imaš i multietničnost i pluralizam a i ono što nemamo - izgradićemo. Ne brani se Bosna u Centru - ideja Bosne i Hercegovine se odbranila u Bosanskom Petrovcu, dragi moj sarajevski desni minderu i draga moja sarajevska "urbana" ljevico.

I zato kad vas neko pita šta je to Bosanski Petrovac, recite da sam vam ja rek'o da je to malo ostrvo na zapadu Bosne i Hercegovine, ostrvo pametnih ljudi koje je periferno samo na mapi. Možda izgledamo kao periferija i provincija, ali ovo je centar vrijedniji od deset Centara.

Izveštaj...

OSVRT NA IZBORE

Na lokalnim izborima, održanim 2. oktobra, na području naše Opštine od ukupno 6.934 birača, glasanju je pristupilo 3.594 glasača.

Naime, na listi za načelnika bila su tri kandidata, nakon prebrojavanja, i objavljivanja rezultata od strane Centralne izborne komisije, Zlatko Hujčić imao je 2.041 glasova, Savo Jovanić je imao 1.144 glasova, a Admir Spahić, 205, te je Zlatko Hujčić sa 60,21% potvrdio mandat i postao novoizabrani načelnik naše Opštine.

Kada je riječ o Opštinskom vijeću, koje broji 17 članova, vrlo je šaroliko, ali u tome i jeste njegova posebnost, kao i bogastvo naše Opštine.

Stranka demokratske akcije imala je 749 glasova, a u Vijeće su ušla četiri kandidata: Haris Mešić, Mithad Hidić, Elma Terzić i Safet Kamarić.

Stranka Savez nezavisnih socijaldemokrata imala je 499 glasova, u Vijeću su dva kandidata: Svetko Dukić i Dušan Došen.

Stranka Demokratskog narodnog saveza imala je 301 glas, a njeni kandidati u Vijeću su Dragan Dragić i Duško Kecman.

Socijalistička partija je imala 272 glasa, Nikolina Simić je kandidat koji je imao najveći broj glasova, te je s tim postala član Vijeća.

Naša stranka imala je 260 glasova, te je Zdravko Radošević kandidat koji je ušao u Vijeće.

Demokratska fronta je imala 231 glas, te je njen kandidat Rusmir Mujadžić postao član Vijeća.

A-Stranka demokratske akcije imala je 222 glasa, a njen kandidat u Vijeću je Izeta Ferizović.

Demokratska narodna zajednica imala je 181 glas, a njen kandidat Marinko Mrđa je postao član Vijeća.

Stranka za bolju budućnost imala je 138 glasova, te je Smail Hadžić, njen kandidat postao član Vijeća.

Socijaldemokratska partija je imala 128 glasova, te je njen kandidat Adnan Družić postao član Vijeća.

Stranka za Bosnu i Hercegovinu imala je 119 glasova, te njen kandidat Muhamed Dračić postaje član Vijeća.

Srpska napredna stranka imala je 109 glasova, te je njen kandidat Dejan Prošić postao član Vijeća.

Narodna stranka radom za boljitak je imala 50 glasova, što znači da nije ostvarila dovoljno glasova da njen kandidat bude član Opštinskog vijeća.

Sedamnaest novih/starih vijećnika će u narednih četiri godine raditi za bolju budućnost i napredak Bosanskog Petrovca.

Na starom mjestu u novom sazivu...

Konstituirajuća sjednica Opštinskog vijeća

Konstituirajuća sjednica Opštinskog vijeća novog saziva održana je 22. novembra u Vijećnici Opštine.

Za dnevni red sjednice bilo je predloženo pet tačaka. Na samom početku predsjedavajuća starog saziva, Bobana Velaga, upoznala je vijećnike o ovjeri mandata od strane Centralne izborne komisije koji su dobili vijećnički mandat.

Nakon toga, uslijedila je svečana izjava, polaganje zakletve izabranih vijećnika i potpisivanje svečane izjave.

Potom je uslijedilo donošenje Odluke o izboru Komisije za izbor i imenovanje gdje su izabrani Haris Mešić, kao predsjednik,

Dušan Došen, Smail Hadžić, Rusmir Mujadžić i Nikolina Simić kao članovi.

Isto tako, donesena je Odluka o izboru Izborne komisije za izbor predsjedavajućeg i zamjenika predsjedavajućeg.

Naime, data su dva prijedloga na glasanje: Dejan Prošić i Nikolina Simić – za predsjedavajućeg i Mithad

Hidić i Muhamed Dračić- za zamjenika predsjedavajućeg Opštinskog vijeća.

Nakon glasanja, izabrani su: Nikolina Simić za predsjedavajuću Vijeća, te Mithad Hidić, za zamjenika predsjedavajućeg.

Sjednicu je nastavila voditi predsjedavajuća novog saziva, koja je zaželjela sretan i konstruktivan rad novog saziva vijećnika.



Polaganje svečane zakletve novog saziva Opštinskog vijeća

U Domu kulture...

Svečana akademija povodom Dana državnosti BiH

Povodom obilježavanja 25. novembra, Dana državnosti Bosne i Hercegovine, 24. novembra je u Sali Doma kulture održana Svečana akademija, gdje su građani prisustvovali i svečanoj sjednici novog saziva Opštinskog vijeća.

Prije toga, u toku dana, načelnik Hujić, predsjedavajuća Simić, zamjenik predsjedavajuće Hidić, i ostali vijećnici Opštinskog vijeća položili su cvijeće na spomen obilježja u našem gradu: na Trgu šehida, spomenicima ispred zgrade Opštine, partizanskom groblju, mjestu spajanja 5. i 7. Korpusa Armije BiH, te ispred Biblioteke „Skender Kulenović“.

Naime, svečanost je počela himnom BiH, nakon čega se prisutnima obratila predsjedavajuća Vijeća, Nikolina Simić, i načelnik Zlatko Hujić.

Predsjedavajuća je pojasnila da BiH ima svoju istoriju i narod koji je prošao kroz razne faze.

Svečana akademija, prema njenim riječima, bila je prilika se svi prisjete hrabrih Bosanaca i Hercegovaca, koji su se okupili u Mrkonjić Gradu, gdje su potvrdili identitete, državnost i suverenitet BiH, ali i prilika da se prisjete svih koji su se borili za ovu državu. Na kraju svog govora osvrnula se i na sadašnje stanje države i naše Opštine, nadajući se da će Vijeće u sadašnjem sazivu konstruktivno djelovati u cilju razvoja naše Opštine.

Na to se nadovezao i načelnik Hujić, rekavši da se Bosanski Petrovac konačno pomjerio sa „mrtve tačke“, te da sa zadovoljstvom može reći da naša Opština više ne spada u nerazvijene opštine. Između ostalog, načelnik je istakao i da bi saradnja sa Opštinskim vijećem trebala biti jedinstvena kao prsti ljudske šake, jer jedino tako možemo ići ka daljem napretku.

Svečani program uveličan je i kulturno-zabavnim dijelom, u kojem su učestvovali: Dječiji vrtić, sa tačkama: „Domovina- srce ovog svijeta“ i igrokaz- Bosna, Osnovna škola se predstavila sa recitacijom „Bosna“, srednja škola sa dvije tačke: „U Bosni se pjesma ori, u Bosni se riječ zbori“ i „Moja i tvoja Bosna“, kao i niža muzička škola sa kratkom etidom.

Svečanosti su prisustvovali vijećnici, ostali predstavnici kulturnog i javnog života, i brojni građani naše Opštine.



Publika u Domu kulture na akademiji povodom Dana državnosti

13 novih kuća za povratnike

Donator- Ministarstvo za izbjeglice i raseljena lica
Republike Srpske

U okviru Projekta rekonstrukcije stambenog fonda iz sredstava Saudijskog fonda za međunarodni razvoj- SDF, 26. oktobra je u maloj Sali potpisan tripartitni ugovor između ministra Davora Čordaša, ispred Ministarstva za izbjeglice i raseljena lica Republike Srpske- implementatora, načelnika Zlatka Hujića, ispred Opštine i korisnika.

Riječ je o 13 ugovora za sanaciju/rekonstrukciju/izgradnju kuća odabranih korisnika, i obavezuje implementatora da će izvršiti sanaciju/rekonstrukciju/izgradnju po sistemu „ključ u ruke“.

Pored uloge Opštine, kao poveznice, između korisnika i implementatora, kao ugovorena strana saglasna je i da pruži tehničku pomoć u izdavanju svih neophodnih dozvola i odobrenja za izvođenje radova na rekonstrukciji stambenih jedinica, te da se stvore svi uslovi da izvođač počne sa radom odmah po potpisivanju ugovora o izvođenju radova.

Bosanski Petrovac je izabrana kao jedna od Opština za koju se smatra da je potrebno da koristi sredstva iz Saudijskog fonda, a Fond je odobrio 18.000.000 američkih dolara za Projekat obnove stambenih jedinica za izbjegle i raseljene osobe u BiH.

„Zahvaljujem se ljudima koji su došli sa raznih strana da bi potpisali Ugovore, jer njihove kuće tek treba da se grade. Prema procjeni osigurano je 380.000.000 KM za ovaj projekat. Do sada smo izvršili izradu projektne dokumentacije koja je ovom prilikom dostavljena Opštini, a poslije potpisivanja ugovora pristupit će se proceduri odabira izvođača radova. Vjerujem da će se već na proljeće kuće početi graditi, i da će vrlo brzo korisnici biti u svojim kućama“, rekao je ministar Čordaš.

Trinaest je korisnika koji su potpisali ugovor: Krstanović Lazo, Kovačević Jovan, Šobot Slavko, Trninić Dragan, Grbić Milan, Kerkez Dragan, Uzelac Jovo, Radanović Zdravko, Šljivar Milan, Kerkez Srđan, Kovačević Dragan, Grbić Drago, Kokoruš Bosiljka.

„Ovaj put 13 je sretan broj. Čestitam korisnicima, i vjerujem da će se aktivnosti dalje odvijati kako je ministar i najavio. Stvarno radimo prave humane stvari, stojim iza toga da će Opština ispuniti ono što je obavezuje. Nastavljamo dalje raditi i graditi, naravno“, ističe načelnik Hujić.

Na radost svih onih koji su u stanju potrebe saradnja se i dalje nastavlja, Ministar je spomenuo skoro izgradnju zgrade od 20 stanova u našem gradu: „Mi zajednički radimo mnogo projekata, pored ovog postoji i Regionalni stambeni program koji će u Opštinu Bosanski Petrovac donijeti zgradu od 20 stanova“, završne su riječi ministra Čordaša.



Zadovoljni korisnici sa načelnikom i ministrom Davorom Čordašom (lijevo od načelnika)

Potpisan Ugovor za donacije

Donator- Federalno ministarstvo raseljenih osoba i
izbjeglica

U maloj Sali 17. oktobra upriličeno je svečano potpisivanje tripartitnog ugovora između Federalnog ministarstva raseljenih osoba i izbjeglica, Opštine Bosanski Petrovac, i korisnika koji su zadovoljili kriterije Javnog poziva za obnovu i rekonstrukciju kuća iz 2015. godine.

Riječ je o donacijama u građevinskom materijalu za stambene objekte, kroz programe pomoći održivog povratka.

Na samom početku svečanosti načelnik i predstavnici Ministarstva Jasminka Džonlić, viši stručni saradnik, i Salem Beširević pozdravili su prisutne korisnike, te ih upoznali sa pravima i obavezama koje nosi ugovor kojeg potpisuju.

Potpisani ugovor reguliše obaveze svih strana u vezi sa dodjelom donacije i sanacijom stambenog objekta, kao i povratak u isti.

U prvom krugu odabrana su 4 korisnika koja će dobiti građevinski materijal, a koji su prethodno dali izjave da su saglasni da prihvate materijal bez ugradnje.

Ovim potpisanim ugovorom donator je dužan korisniku isporučiti građevinski materijal u roku od 40 dana od dana potpisivanja, te se korisnik, također, obavezuje da u roku od šest mjeseci od dana završetka isporuke materijala izvrši popravku svoje kuće.

U ime Opštine ugovor je potpisao načelnik Hujić. Kako su sve ugovorene strane dobile obaveze, tako se i Opština obavezala da će pomoći korisniku i donatoru u cilju što bolje implementacije obnove stambene jedinice. „Zadovoljan sam današnjim potpisivanjem ugovora, jer smo zajedničkim snagama zbrinuli još četiri porodice. Ovo je dokaz progresivne stambene politike koju nastavlja opštinska administracija“.

Zadovoljni korisnici koji su se našli u stanju potrebe i koji su potpisali ugovor: Čulibrk Sreto iz Dževera, Omić Mesud iz Jezerske ulice, Jaganjac Mirzad iz Biščana i Gutlić Amel iz Rašinovca uz ugovor su dobili i listu građevinskog materijala koji im je namijenjen.

Jasminka Džonlić iz Ministarstva napomenula je da je odabir ova četiri korisnika tek prva faza realizacije Javnog poziva, te se i za ostale korisnike, koji su na konačnoj listi, očekuje sanacija kuća u narednom periodu, za šta će, naravno, biti obavješteni.



Zadovoljna 4 korisnika sa načelnikom (u sredini) i predstavnicima FMROI- a (prvi s lijeva i treća s lijeva)

20 novih stanova

Potpisan Ugovor o izvođenju radova za izgradnju nove zgrade vrijedne oko 1 milion KM

Načelnik Zlatko Hujić, 14. oktobra prisustvovao zaključivanju Ugovora o Izvođenju radova na višestambenom objektu, koji će na području grada biti izgrađen u sklopu projekta Državni projekat stambenog zbrinjavanja BiH3, čime će u Bosanskom Petrovcu biti izgrađeno 20 stanova za trajno stambeno zbrinjavanje izbjeglih i raseljenih osoba.

Načelnik Hujić je istaknuo da, nakon prošlogodišnje izgradnje zgrade od šest stanova, naša Opština će dobiti još jedan stambeni objekat, ovaj put od 20 stanova, čime se uvećava stambeni fond našeg grada i očekivano dobijamo epitet lidera u oblasti socijalnog neprofitnog stanovanja u USK, ali i šire.

Ministrica za ljudska prava i izbjeglice BiH Semiha Borovac, Federalni ministar raseljenih osoba i izbjeglica Edin Ramić i direktor Fonda za povratak BiH Nebojša Švraka s načelnicima i gradonačelnicima šest opština i gradova u FBiH, i izabranim izvođačima u Sarajevu su potpisali ugovore o izgradnji stambenih zgrada u vrijednosti 5.655.692 KM.

Izgradnja stanova financira se iz multidonatorskog Fonda Regionalnog stambenog programa s prevlađujućim

učešćem IPA sredstava, a koja je osigurala Europska Unija. U okviru ovog, trećeg pod-projekta Državnog projekta stambenog zbrinjavanja bit će izgrađeno 20 višestambenih zgrada sa ukupno 438 stanova, od kojih 178 u Federaciji BiH, 252 u Republici Srpskoj, i 8 u Brčko Distriktu BiH. Potpisivanjem ugovora počinje izgradnja 133 stana za trajno stambeno zbrinjavanje izbjeglih i raseljenih osoba u 6 višestambenih objekata u gradovima Zenica (62 stana) i Tuzla (20 stanova), te sljedećim opštinama Federacije BiH: Bosanski Petrovac (20 stanova), Olovo (16 stanova), Foča u FBiH (9 stanova) i Pale-Prača (6 stanova).

Sveukupna vrijednost BiH3 je više od 30 milijuna KM. Gradovi i opštine su osigurala vlastito učešće u vrijednosti od gotovo 1.6 miliona KM, što čini ukupnu vrijednost ovih projekata od oko 7,3 miliona KM. Doprinos se sastoji od građevinski opremljenog zemljišta, priključaka na infrastrukturu, taksu i sl., a navedene lokalne zajednice su također iz vlastitih sredstava finansirale izradu investiciono-tehničke dokumentacije i revizije glavnih projekata.

Pod vodstvom Ministarstva za ljudska prava i izbjeglice BiH, Državni projekt stambenog zbrinjavanja u okviru Regionalnog stambenog programa provode Jedinice za implementaciju projekta: Federalno ministarstvo raseljenih osoba i izbjeglica, Ministarstvo za izbjeglice i raseljene osobe Republike Srpske i Odjel za raseljene osobe, izbjeglice i stambena pitanja Brčko Distrikta BiH u suradnji s lokalnim zajednicama širom naše zemlje.

Do kraja 2017. godine zgrada od 20 stanova u našoj Opštini

Uz prisustvo predstavnika Federalnog ministarstva raseljenih osoba i izbjeglica, na prijemu u kabinetu načelnika Hujića, 17. novembra potpisan je Zapisnik o uvođenju u posao izvođača-firma „Gratod“ i nadzornog organa- firma „IG“, za izgradnju višestambene zgrade od 20 stanova u Bosanskom Petrovcu.

Planirano je da radovi traju oko 300 dana, a na taj način će biti trajno stambeno zbrinuto 20 porodica izbjeglih i raseljenih osoba iz naše Opštine.


Vrijednost projekta je 950 hiljada KM, a za izgradnju objekta Opština je osigurala 13 % sredstava od ukupne vrijednosti, za zemljište, građevinsku dozvolu, revidiranu projektnu

dokumentaciju, priključke struje i vode, kanalizaciju, te pristupni put.

Višestambeni objekat će na području grada biti izgrađen u sklopu Državnog projekta stambenog zbrinjavanja BiH3. Opština je sudjelovala i u pod-projektu BiH 1, gdje je za 7 korisnika već izgrađena kuća, i BiH 2, gdje je kuća izgrađena za 4 korisnika.

Cilj projekta je pomoći ugroženim izbjeglim i raseljenim osobama u iznalaženju rješenja za socijalne izazove s kojima se suočavaju.

Prisutni su izrazili zadovoljstvo zbog prilike koja je pružena, pa je tako načelnik Hujić istakao da se ovaj projekat mora voditi savjesno i ozbiljno, te da će imenovati i supervizora koji će u ime Opštine nadgledati radove jer, na kraju stanovi ostaju u vlasništvu Opštine Bosanski Petrovac.



Delegacija na prijemu kod načelnika

Donacija u vidu plastenika, freza, kosačica, motokultivatora

Humanitarna organizacija Hilfswerk Austria International finansirana sredstvima UNHCR-a i Evropske Unije, u okviru projekta IPA-EU/ UNHCR, pod nazivom „Podrška trajnim rješenjima revidirane strategije za provedbu Aneksa VII Dejtonskog mirovnog sporazuma“, 2. novembra je izvršila isporuku grantova za ekonomsku održivost korisnicima u našoj Opštini.

Naime, riječ je o 6 korisnika kojima su prethodno izgrađene kuće kroz ovaj Projekat: Hajirić Mersada iz Dževara i Mujagić Alisa iz Bahića su dobile plastenik za uzgoj povrća, Marjanović Rade iz Smoljane dobio je frezu za postojeći traktor, Redžić Hamdija iz Revenika dobio je motokultivator sa frezačima, Surla Dušan sa Vranovine dobio je samohodnu brdsku kosačicu, a Romčević Radojka iz Bukovače dobila je steonu junicu.

Pored uloge koordinatora između korisnika i humanitarne organizacije, Opština je aktivno pružala tehničku pomoć u izdavanju svih neophodnih dozvola i odobrenja za izvođenje radova na rekonstrukciji stambenih jedinica, izradi projektne dokumentacije i dodjeli zemljišta.

Ova humanitarna organizacija svoje aktivnosti realizuje kroz rekonstrukciju stambenih jedinica i nabavku roba/ sredstava za samozapošljavanje i ostvarivanje prihoda za korisnike Projekta, povratnike i raseljena lica na području deset opština u BiH.

Stigle krave na farmu „Fana-Arifagić“

Na „Fana-Arifagić“ u Krnjeuši stigle su prve krave, kako je bilo i najavljeno, nakon kontingenta od 100, stigao je još jedan od 50 grla.

Naime, nakon što je kompanija Arifagić Investment iz Kozarca kod Prijedora svoju proizvodnju odlučila proširiti i na prostor Opštine Bosanski Petrovac, koristeći povoljne vremenske prilike, ubrzano se radilo na rekonstrukciji objekata i prateće infrastrukture, te su se stekli uslovi da prva grla stignu na farmu u Bosanskom Petrovcu.

Naime, trenutno „Fana-Arifagić“, broji ukupno 150 krava, a prema riječima vlasnika, u martu naredne godine se očekuje isporuka još jednog kontingenta od 200 grla.

„Danas smo ispunili ono što smo obećali, tj. da ćemo u ovoj godini isporučiti kontigent od 150 grla. Svi dalji planovi će biti isključivo vezani za završetak radova, i ako sve bude po planu početkom marta očekujem da ćemo prebaciti novih 200 grla stoke“, riječi su vlasnika Arifagića.

U obnovi objekata, vodovoda i instaliranju nove trafostanice na farmi Fana u Krnjeuši do sada je uloženo više od 200.000 KM.

Po dolasku prvih 150 krava, radovi na rekonstrukciji objekata i montaži opreme bit će nastavljani.

Najava novih radnih mjesta

U daljem razgovoru, Arifagić najavljuje i nova zaposlenja u svojoj kompaniji: „Nadam se da će ljudi kompaniju Arifagić Investment shvatiti kao naš zajednički projekat, jer isporuka svakog novog kontingenta donosi još više radnih mjesta, a ja mislim da je to u interesu svih građana Bosanskog Petrovca. Zaposlio sam još jednog radnika, što znači da „Fana-Arifagić“ trenutno ima 6 radnika, međutim, dolazak novog kontingenta iziskuje i dodatnu radnu snagu, koliko će radnih mjesta biti, to ćemo još vidjeti“, rekao je Arifagić.

„Naša Opština podržava ovaj projekat, jer samim dolaskom krava na farmu „Fana-Arifagić“ pokazatelj je da se u opštini razvija grana poljoprivrede, što znači veći broj radnih mjesta, a samim tim i sam razvoj Opštine Bosanski Petrovac“, rekao je Nevsad Ramić, Šef Službe za obrt, poduzetništvo, razvoj i poljoprivredu.



Dolazak krava na farmu...



Krave na farmi „Fana-Arifagić“

Status Zahtjeva za poticaje uskoro će se moći pratiti na internetu

Predstavnici naše Opštine, Službe za obrt, poduzetništvo, razvoj i poljoprivredu, Muhamed Mehić i Dragana Manojlović su 25. oktobra u Sarajevu prisustvovali predstavljanju softvera za obradu novčanih poticaja u poljoprivredi i web portala koji je namijenjen poljoprivrednicima.

Prezentaciju softverskog rješenja održali su predstavnici Federalnog ministarstva poljoprivrede, vodoprivrede i šumarstva u saradnji i uz tehničku podršku kompanije KING ICT.

Softversko rješenje na web stranici Ministarstva omogućit će povezivanje registara poljoprivrednih gazdinstava i klijenata sa sistemom plaćanja, a kroz njegovu realizaciju će se svakom poljoprivrednom proizvođaču omogućiti da u svakom momentu bude upoznat sa statusom njegovog zahtjeva za ostvarivanje poticaja u poljoprivrednoj proizvodnji, kao i sve informacije koje se tiču programa utroška.

I naša Opština će imati pristup ovoj bazi, pa će poljoprivrednici uskoro moći pratiti informacije po pitanju svog zahtjeva putem web stranice Ministarstva, o čemu će biti blagovremeno informisani.

Ovakav sistem bi trebao doprinijeti da sredstva koja se izdvajaju, na vrijeme dođu u prave ruke.

Omladinska banka u našoj Opštini i u iduće 2 godine

Načelnik Zlatko Hujić je 14. novembra u Sarajevu potpisao Memorandum o saradnji sa Fondacijom Mozaik.

Potpisivanjem Memoranduma o saradnji naša Opština i Mozaik potvrđuju da će partnerski doprinijeti nastavku razvoja programa Omladinska banka Bosanski Petrovac, kao i razvoju društvenog poduzetništva mladih i njihovih društvenih biznisa u periodu, novembar 2016 – decembar 2018. godine.

Naime, program Omladinska banka omogućava mladima da prepoznaju društvene probleme u svojoj Opštini i rješavaju ih kroz društveno inovativne projekte, a najuspješniji dobijaju finansijsku i konsultantsku podršku za razvoj prototipa svog biznisa.

Pored ovoga, Program omogućava mladima da razvijaju 7 ključnih kompetencija: menadžment, vođenje, timski rad, kritičko mišljenje, komunikaciju, kreativno mišljenje i poslovnu sposobnost.

Zajednički fond za program Omladinske banke u dvogodišnjem periodu trajanja ovog memoranduma će iznositi 38.700 KM, dok će zajednički fond za društveno inovativne projekte Omladinske banke iznositi 22.200 KM.

Nastavlja se projekat adresnog registra u našoj Opštini

U okviru projekta „Izgradnja kapaciteta za unapređenje zemljišne administracije i procedura u Bosni i Hercegovini“, predstavnici Federalne uprave za geodetske i imovinsko-pravne poslove, Denis Tabučić i Ivan Kvesić, 3. novembra su u prostorijama naše Opštine održali prezentaciju projekta, te dali korisne savjete i upute kako iskoristiti iskustva drugih u realizaciji projekta- uspostave adresnog registra.

Prezentaciji su, pored načelnika Hujića, prisustvovali i predstavnici Službi koje se bave prostornim uređenjem, imovinsko-pravnim poslovima i stambeno-komunalnom djelatnošću, Nataša Kecman i Omer Hodžić.

U toku su postupci za uspostavu adresnog registra u više od 20 opština u Federaciji BiH i Republici Srpskoj. U prethodnom periodu predstavnici opštine su prisustvovali prezentacijama ovog projekta, gdje je naša Opština prepoznala važnost i potrebu da se uključi i uspostavi sopstvenu aplikaciju adresnog registra.

Cilj uspostave je da se uz tehničku podršku institucija i entitetskih geodetskih uprava stvore uslovi za razmjenu podataka, što će olakšati različite analize, procjene i strategije kad su u pitanju različiti sektori, a posebno ekonomski i socijalni.

Svi prisutni su se složili da je ovo veoma značajan projekat za našu Opštinu jer je razvoj operativnog adresnog sistema jedna od veoma važnih pretpostavki za uspostavu funkcionalnog i dobro organizovanog društva.

Policajci, vatrogasci i hitna pomoć obavljanje socijalnih usluga, brige o starima, ne mogu obavljati na efikasan način bez tačnog sistema adresnog registra. Mogućnost da se lako nađe tačna lokacija, posebno u ruralnim i siromašnim gradskim područjima, od ključnog je značaja u pružanju nediskriminirajućih usluga pomoći, omogućujući svim građanima jednak pristup vitalnim društvenim uslugama. Ovim bi se onemogućila manipulacija prijave na nepostojeće adrese, odnosno nepostojeće ulice i kućne brojeve.

Seminar u našoj Opštini

„Tehnologija i ekonomski potencijali proizvodnje lana“

Opština Bosanski Petrovac je 14. oktobra bila domaćin dvodnevnog seminara o ekonomskim potencijalima i proizvodnji lana koji se inače održava još u dvije opštine: Drinić i Drvar.

Prvog dana prezentovane su dvije teme. Prva tema je vezana za proizvodnju i upotrebu uljarica s posebnim osvrtom na lan, u kojoj je dr. Miloš Nožinić sa poljoprivrednog instituta Republike Srpske govorio o značaju i upotrebi lana, kako se priprema zemljište, vrši sjetva, žetva, koje su mogućnosti prerade, te posebno istakao preradu lana kroz postupak dobijanja hladno cijedenog ulja.

Drugu temu je predstavio dr. Mile Gluvačević- inspektor za organsku proizvodnju koji je govorio o samoj organskoj proizvodnji lana i heljde kao šanse za porodična poljoprivredna domaćinstva u našoj Opštini.

Seminaru su prisustvovali građani iz naše Opštine koji se već i profesionalno bave proizvodnjom lana, ali i oni koji tek žele da se okušaju.

Jedan od onih koji su ovu proizvodnju shvatili vrlo ozbiljno je Miodrag Latinović, već prepoznatljiv po proizvodnji lana i lanenog ulja: „*Ko se god prihvati ovog posla, savjetovao bih da se uradi sjetva u tri vremenska roka, jer će se tek onda moći utvrditi koji vremenski rok lanu odgovara, ja sam tako uradio, te sam na taj način jako dobro uspio izbjeći mrazeve*“, ističe Latinović.

Predavači su istakli, između ostalog, da je Bosanski Petrovac izrazito povoljan za proizvodnju lana, razloga je mnoštvo a najznačajniji je broj sunčanih dana, čak 300, koji su mu neophodni.

Ono o čemu se posebno govorilo je ljekovita moć lanenog ulja koji djeluje na ćelije raka, aterosklerozi, srčane tegobe, probavu, imunitet, ali i je efikasno i pri korištenju za vanjsku primjenu, nanošenjem na kožu.

Seminar se nastavio i sutradan, kada je pored teorijskog dijela organizovan i odlazak na demonstracionu parcelu, da sve ono što su naučili, učesnici i vide u praksi.

U našoj Opštini do sada registrovani proizvođači lana: Miodrag Latinović, Kerkez Vojin, Spahić Ramiz, Radišić Jovo i Nikola Salapura, svoju su proizvodnju smjestili na 8 hektara raspoređenih u četiri Mjesne zajednice: Vrtoče, Suvaja, Bjelaj i Rašinovac.

U vijećnici 19. i 20. oktobra...

Obuka u oblasti prostornog planiranja

Agencija za državnu službu Federacije Bosne i Hercegovine, u okviru Sistema obuke za jedinice lokalne samouprave, u našoj Opštini održala je dvodnevnu obuku u oblasti prostornog planiranja.

Obuka je u vijećnici okupila uposlenike jedinica lokalne samouprave koji rade na poslovima prostornog planiranja i izgradnje, te uposlenike koji rade u službama za lokalni ekonomski razvoj iz cijelog Kantona, koji čine primarnu ciljnu grupu, kao i predstavnike kantonalnih ministarstava iz ove oblasti, koji su sekundarna ciljna grupa.

Svrha obuke je unapređenje znanja i predstavljanje primjera iz prakse u oblasti prostornog planiranja, razmjena informacija među opštinama kroz otvorenu diskusiju u cilju traženja načina za prevazilaženje praktičnih problema i rješavanja nejasnoća sa kojima se uposlenici organa državne službe susreću u praksi.

Značaj postupka vezanih za planiranje i izgradnju jedinice lokalne samouprave ogleda se u tome što je direktno povezana sa pružanjem kvalitetnih usluga građanima, što je i najznačajniji razlog održavanja obuke.

Treneri na obuci bili su Šaćir Šošević, diplomirani ekonomista i inženjer geodezije i Hajrudin Omerbegović, magistar saobraćaja.

“Naš zadatak je da saslušamo koji su problem u izradi planske dokumentacije, te da pokušamo djelovati na vrlo konkretan način kroz program rada u jednom skorijem periodu. Ovo je četvrti po redu dvodnevni seminar, prestoji nam još jedan u Sarajevu”, riječi su trenera Šoševića.

U okviru prvog dana učesnici su upoznati sa tri modula, u okviru kojeg je bilo riječ o etapama razvoja prostornog planiranja, konvencijama, direktivima i zakonima prostornog planiranja.

Nakon prezentacije u okviru prvog dana polaznici su utvrdili prijedloge za poboljšanje postojećeg stanja u oblasti provođenja planova od strane organa uprave.

Obuka se nastavila i sutra kada su učesnicima predstavljena nova tri modula.

Pored naše Opštine održava ovaj vid predavanja održao se i u Vitezu, Tuzli, Tomislavgradu i Sarajevu.



Učesnici obuke

Održana stručna obuka za matičare

Federalno ministarstvo unutrašnjih poslova održalo je 21. novembra, u Vijećnici naše Opštine stručnu obuku za matičare i druge uposlenike organa uprave koji rade na poslovima državljanstva i matičnih knjiga.

Obuci su prisustvovali državni službenici i namještenici opština iz dva kantona: Kantona 10 i Unsko-sanskog kantona iz 14 opština, među kojima su predstavnici naše Opštine, Bihaća, Bosanske Krupe, Bužima, Cazina, Ključa, Sanskog Mosta, Velike Kladaše, Livna, Bosanskog Grahova, Drvara, Glamoča, Kupresa i Tomislavgrada.

Iz svake opštine prisustvovala su po dva ili tri državna službenika ili namještenika, a ispred domaćina, naše Opštine, u stručnoj obuci učestvovali su Bajazid Hadžalić i Zerina Hajder.

Predstavnicima Federalnog ministarstva unutrašnjih poslova, treneri na stručnoj obuci, učesnike su upoznali sa znanjima u oblasti sticanja državljanstva Federacije Bosne i Hercegovine i upisa podataka u matičnu knjigu rođenih i matičnu knjigu državljana.

Obuka je bila interaktivnog tipa gdje su učesnici mogli da postavljaju pitanja i razjasne nedoumice s kojim se susreću u praktičnoj primjeni svojih nadležnosti.

Privredna komora USK

Edukacija „Tržište i proizvodnja maline“

Predstavnik naše Opštine, Službe za obrt poduzetništvo, razvoj i poljoprivredu, Dragana Manojlović- stručni saradnik za planiranje i razvoj poljoprivrede učestvovala je 1. novembra na edukaciji koja je održana u Bihaću u Privrednoj komori USK, na temu „Tržište i proizvodnja maline“.

Edukaciju su organizirali Vanjskotrgovinska komora BiH i Switzerland Global Enterprise/SIPPO (Švicarski program podsticanja uvoza u EU i Švicarsku), u saradnji sa Privrednom komorom Unsko-sanskog kantona.

Cilj organizacije ove stručne edukacije je jačanje izvoznih kapaciteta firmi iz sektora svježeg voća i povrća.

Nakon uvodne i pozdravne riječi organizatora i predstavljanja misije i aktivnosti Switzerland Global Enterprise/SIPPO (Švicarski program podsticanja uvoza u EU i Švicarsku) u Bosni i Hercegovini, predstavljeni su i predavači: prof.dr. Nikola Mičić, dekan Poljoprivrednog fakulteta u Banjoj Luci i gđin. Mile Gluvačević, ekspert za organsku proizvodnju.

Osim o samoj sadnji, načinu i tehnologiji uzgoja maline, te trendovima u svijetu i u Bosni i Hercegovini, prisutni su imali priliku čuti koji su to sortimenti maline koji se mogu preporučiti za uzgoj (Himbo top, Tula magic, Glen Ample, te Polka, Heritage, Amira, Kwanza), kao i za uzgoj namijenjen zamrzavanju (vilamet, miker i fertodi zamatos).

Na edukaciji je, također, bilo riječi o organskoj proizvodnji i certifikaciji, a u ovom dijelu značajne informacije, prisutnima je prenio ekspert za organsku proizvodnju Mile Gluvačević.

Ono što je Gluvačević istaknuo je da je u RC ARGONET Banja Luka implementacija ka certifikaciji besplatna (analiza početnog stanja, smjernice za uređenje infrastrukture, izrada dokumentacije, obuka osoblja, te pomoć kod aplikacije).

Na edukaciji su sudjelovali i predstavnici Ministarstva poljoprivrede, vodoprivrede i šumarstva, predstavnici Opština, Biotehničkog fakulteta Univerziteta u Bihaću, kompanija i proizvođači maline iz Bihaća, Banja Luka, Sarajeva, Srpc, Kozarca, Bužima, Bosanske Krupe, Velike Kladuše i Skoplja. Nacrt Zakona o turizmu USK-a

Javna rasprava

Javna rasprava o Nacrtu Zakona o turizmu Unsko-sanskog kantona održana je 3. novembra u Vijećnici opštine.

Nacrt ovog Zakona u skupštinsku proceduru uputilo je Ministarstvo privrede

Unsko-sanskog kantona, usvojila ga je Vlada, a polovinom oktobra svojim Zaključkom

Skupština USK-a je zadužila Kantonalno Ministarstvo privrede da u roku od 30 dana od dana usvajanja Nacrta provede javnu raspravu po svim opštinama Kantona.

Učesnicima javne rasprave Nacrt Zakona o turizmu približili su Ante Marjanović, predsjednik Komisije za utvrđivanje Prijedloga Zakona, te Hasan Bajraktarević i Almir Smajić, predstavnici Ministarstva privrede.

Govorilo se o razlozima za donošenje ovog Zakona, a kao jedan od razloga navedeno je da lokalne zajednice nisu imale nadležnost u donošenju odluka i kreiranju politike turizma na svom području, čime opštine nisu bile u mogućnosti da ovu oblast uređuju u skladu sa svojim interesima.

Također, trenutno stanje u oblasti turizma poprilično je neuređeno, a unazad nekoliko godina evidentan je porast broja turista na našem Kantonu. **Ukoliko postoji interes lokalnih vlasti Zakon o turizmu predvidio je i osnivanje turističkih zajednica na nivou opštine, čime će lokalne zajednice biti u mogućnosti da samostalno promovišu vlastite turističke potencijale.**

Raspravi su pored predstavnika Opštine, Šefa službe za obrt, poduzetništvo, razvoj i poljoprivredu- Nevsada Ramića, Mirele Tešnjak i Ene Širbić, stručnih saradnika pri Službi prisustvovali i vlasnik seoskog domaćinstva „Čardaklije“, predstavnik vlasnika skijališta na Oštrelju i vlasnika nekolicine ugostiteljskih objekata u našoj Opštini.

„Predstavnicima organa uprave pokazali su zainteresovanost u ovoj oblasti. Vladala je lijepa, radna i domaćinska atmosfera. Situacija u turizmu je veoma složena, zbog toga smo u procesu donošenja novog Zakona, što će se u narednom periodu desiti, kao i mogućnost osnivanja opštinskih turističkih zajednica“, rekao je Ante Marjanović.

Predstavnicima Službe imaju mogućnost da sve prijedloge, pitanja koja danas nisu postavili, i dobili odgovor upute Ministarstvu kroz narednih 15 dana, kako bi i naša Opština učestvovala u samoj izradi i donošenju Zakona.

„Naša Opština ima potencijale koji su samo jednim dijelom iskorišteni. Veliki značaj treba dati razvoju ruralnog turizma, koji pored pozitivnih privrednih i ekonomskih aspekata, može biti i značajan činilac u zaustavljanju nepovoljnih trendova migracija stanovništva i pražnjenja naših sela. Nadam se da će novi zakon o turizmu doprinijeti da se promoviše naš svjež vazduh, planine pogodne za rehabilitacione centre i još mnogo toga“, istakao je Nevsad Ramić, Šef službe.

Jedan od očekivanih efekata od donošenja ovog Zakona se odnosi na suzbijanje i smanjenje sive ekonomije i rada na crno u oblasti turizma, ističe Marjanović.

Prvo mjesto za MZ Kolunić, drugo za MZ Vrtoče, treće za MZ Bukovača

Prvo mjesto za JP „Komunalno“

Povodom završetka provođenja projekta „Kompostiranje bio-otpada na području regije Bihać 2016.“, za koji je bilo zaduženo Ministarstvo za građenje, prostorno uređenje i zaštitu okoliša USK, u Bihaću je 18. oktobra upriličeno svečano proglašenje i dodjela nagrada najuspješnijim mjesnim zajednicama, preduzećima i ustanovama. Projekat se na području USK-a realizira od 2013. godine. Pored svih, provodi se i u našoj Opštini.

Prvo mjesto u Bosanskom Petrovcu, u kategoriji mjesnih zajednica osvojila je MZ Kolunić, drugo mjesto MZ Vrtoče, a treće mjesto MZ Bukovača, a kad je riječ o preduzećima, prvo mjesto je osvojilo JP „Komunalno“.

Nagrade su novčane prirode. Za kategoriju mjesnih zajednica, Ministarstvo za građenje, prostorno uređenje

i zaštitu okoliša USK izvršit će transfer u iznosu od 2000 KM, za prvo mjesto, 1500 KM, za drugo mjesto, 1000 KM za treće mjesto, a za kategoriju preduzeća i ustanova, nagrada iznosi 1000 KM.

Mjesec dana nakon dodjele sredstava mjesnim zajednicama, preduzećima i ustanovama predsjednici mjesnih zajednica i predstavnici ustanova i preduzeća, koji su i preuzeli nagradu, trebaju opštinskom timu dostaviti izvještaj o utrošku, a Opština nakon što ih kompletira dostaviti Ministarstvu.

Dodijeljena sredstva nagrađeni predstavnici su dužni utrošiti u dalje aktivnosti očuvanja životne okoline, npr. moći će za svoje potrebe nabaviti kante za otpad, urediti dječije igralište, postaviti klupe za sjedenje, očistiti divlje deponije i još mnogo toga.

Svrha ovog projekta je animirati stanovnike mjesnih zajednica da korištenjem kompostana počnu vršiti selektiranje otpada, upoznati ih sa prednostima kompostiranja, podizati ekološku svijet, te doprinijeti cjelokupnoj kampanji uključivanja javnosti u okviru integrisanog upravljanja otpadom.

Parking iza supermarketa „Tropic“ dobio novi izgled

Poslije intenzivnih radova na izgradnji i uređenju parking prostora iza supermarketa „Tropic“, konačno smo dobili novi, funkcionalniji prostor iza ovog poslovnog prostora.

Investitor izgradnje je Opština Bosanski Petrovac, koja je za ovu investiciju izdvojila 50 000 KM, i ovim još jednom pokazala da joj je prioritet ljepše, funkcionalnije, zdravo okruženje za sve njene građane.

Parking je sada veće površine, prostor je maksimalno iskorišten, na zadovoljstvo stanara, ali i svih građana.

Izvođač radova bio je Dival Sanski Most, a nadzorni organ je firma IG Banja Luka.



Parking- u toku radova



Izgled parkinga nakon radova

Protokol o saradnji opština Bosanski Petrovac i Petrovac-Drinić

U okviru programa „Mjere za izgradnju povjerenja“ kojeg finansira i vodi Vijeće Evrope, potpisan je protokol o saradnji između opština Bosanski Petrovac i Petrovac-Drinić. Ovo je prvi korak u realizaciji zajedničkih aktivnosti.

Opštine su saglasne da će razvijati svoju međusobnu saradnju u svim oblastima za koje zajednički utvrde da su od obostranog interesa. Predstavnici opština će saradivati timski na pripremi i implementaciji inicijativa, programa i projekata od zajedničkog interesa.

U protokolu je navedeno i da će se sastanci održavati najmanje jednom godišnje, sa zadatkom sagledavanja i ocjenjivanja rezultata saradnje u prethodnom periodu.

Nakon potpisivanja protokola opštine su napravili zajednički projektni prijedlog kojeg su dalje aplicirali Vijeću Evrope, a koji se odnosi na pomoć marginaliziranoj skupini stanovništva, ženama i mladima.

Program „Mjere za izgradnju povjerenja“ razmotrit će finansiranje kako projektnih prijedloga naših opština, tako i ostalih međuopštinskih prijedloga, opština koje su kao i naše dejtonski razdvojene, odnosno na entitetskoj granici. Odabrani projekti će se realizirati u 2017. godini.

Polaganje cvijeća na Trgu šehida

Obilježavanje 24. godišnjice formiranja 5. korpusa Armije BiH

U okviru programa manifestacije obilježavanja godišnjice formiranja 5. korpusa, 20. oktobra organizovano je polaganje cvijeća u svim opštinama Unsko-sanskog kantona, pa tako i u našoj.

Načelnik Općine, Zlatko Hujić, u prisustvu predstavnika vjerskog i kulturnog života, boračkih udruženja, javnih ustanova, te privrednih subjekata, položio je cvijeće na Trg šehida i odao počast poginulim borcima i šehidima koji su živote dali za slobodu Bosne i Hercegovine.

Povodom manifestacije, gledaoci su mogli na RTV USK i RTV reportažu dokumenata i sjećanja, a sutradan je bila i upriličena Svečana akademija u Kulturnom centru u Bihaću, dok je prije svečanog dijela organizovano polaganje cvijeća na mezarju Humci, obilazak kasarne Adil Bešić, i džuma namaz.



Delegacija Opštine polaže cvijeće na Trg šehida

Sastanak nezavisnih načelnika

Načelnik Hujić se 12. novembra sastao, u Sarajevu, sa ostalim nezavisnim načelnicima koji su pobijedili na proteklom lokalnim izborima u Bosni i Hercegovini, kako bi razgovarali o budućoj saradnji.

Sastanku su, pored načelnika Hujića, prisustvovali i načelnik Općine Stari Grad Ibrahim Hadžibajrić, načelnica Visokog Amra Babić, načelnik Bužima Zikrija Duraković, načelnik Kalesije Sead Džafić, te gradonačelnici Goražda i Zenice, Muhamed Ramović i Fuad Kasumović.

Naime, nezavisni načelnici i gradonačelnici su istakli da će im problemi lokalne samouprave biti prioritet, te da im za rješavanje istih nisu potrebne političke stranke.

Govorilo se i o Zakonu o raspodjeli javnih prihoda, kao i o Zakonu o lokalnoj samoupravi koji izazivaju probleme u opštinama, zbog čega je nužno predložiti njihove izmjene.

Načelnik Hujić je istakao kako ima obavezu prema građanima Bosanskog Petrovca i da će nastaviti da se bavi njihovim problemima: *“Sastanak kojem sam prisustvovao odličan je početak udruživanja i saradnje koja će doprinijeti ostvarenju zajedničkog cilja”*, rekao je načelnik Hujić.

Načelnici i gradonačelnici su zaključili da svi oni koji su na pozicijama moraju raditi u interesu građana, bez obzira da li pripadaju ili ne pripadaju nekoj političkoj opciji.



Nezavisni načelnici na sastanku u Sarajevu

Tematski poslovni skup u Sarajevu

Regionalna poslovna asocijacija Biznis plus, uz podršku Ministarstva spoljne trgovine i ekonomskih odnosa BiH, 21. oktobra je organizovala Tematski poslovni skup na Jahorini na kojem je prisustvovao i načelnik Zlatko Hujić.

U okviru skupa govorilo se o tržištu energenata (otvorenost, saradnja, projekti, problemi...) i o investicijama (mogućnosti, konkretna ponuda, mogućnosti zajedničkog nastupa, finansije...).

Cilj skupa bio je ne samo otvoriti pitanja i o njima diskutovati, nego i uspostaviti saradnju, predstaviti projekte i mogućnosti, ali i otvoreno razgovarati o cijenama bilo u trgovini energentima, bilo kod investicija u smislu šta se nudi, ko su dobavljači i izvođači i kako mogu zajedno raditi.

Pored toga, Mirko Šarović ministar vanjske trgovine i ekonomskih odnosa i predsjedavajući Energetske zajednice Jugoistočne Evrope koji je, kao domaćin, održao uvodno izlaganje, potom zajedno sa učesnicima poslovnog skupa nastojao predstaviti kako do sada funkcioniše Energetska zajednica, i zašto kompanije još uvijek ne nabavljaju električnu energiju na otvorenom tržištu.

“Ovaj skup je dalji pokušaj da unaprijedimo saradnju u ovoj oblasti, da kandidujemo nove projekte i razmotrimo izvore finansiranja, kao što su EU fondovi”, rekao je načelnik Hujić.

Skupu su prisustvovali i predstavnici domaćih preduzeća i banaka, institucija, regulatora, i jedan broj načelnika.

Srednjoškolci ekonomske škole kroz praksu usvajaju znanja i vještine

U sklopu nastavnog plana i programa trećeg razreda srednje ekonomske škole, učenici MSŠ „Bosanski Petrovac“- smjer ekonomski tehničar, su 24. oktobra posjetili opštinsku Službu za obrt, poduzetništvo, razvoj i poljoprivredu, kako bi kroz ostvarili praksu usvojili nova znanja i vještine.

Učenici u školi pomoću virtuelnih preduzeća između sebe posluju, sami registruju preduzeće, i upravo o tome je bilo riječ tokom posjete- kako registrovati preduzeće?!

Ena Širbić, Viši stručni saradnik za pravne poslove pri Službi, predstavila je učenicima potrebnu dokumentaciju za registrovanje preduzeća, od izjava o vlasništvu, izvoda iz katastra, do zahtjeva za izdavanje odobrenja za obavljanje trgovinske djelatnosti i ostalih akata koji su potrebni za registraciju preduzeća.

Cilj posjete, ali i same prakse je da se učenici osposobe da budu odgovorne, nezavisne, kreativne i poduzetne ličnosti, a zadatak opštinskog organa je da aktivno učestvuju i pruže im u tome što veću podršku.



Učenici srednje škole u posjeti Opštini

„...da se nastavi tradicija pametnih ljudi iz Bosanskog Petrovca...“

Učenici generacije, Esmi Jaganjac, uručena nagrada

Načelnik Zlatko Hujčić i predsjedavajuća starog saziva Opštinskog vijeća, Bobana Velaga, u kabinetu načelnika 17. novembra su uručili nagradu od 1.000,00 KM učenici generacije Osnovne škole „Ahmet Hromadžić“, Esmi Jaganjac.

Prijemu u kabinetu načelnika prisustvovali su i roditelji učenice, kao i direktorica Osnovne škole, Mujesira Kavaz.

Načelnik Hujčić i predsjedavajuća Vijeća Velaga čestitali su učenici na uspjehu i izrazili zahvalnost roditeljima zbog

njihovih napora da omoguće Esmi da postigne uspjeh u dosadašnjem i budućem školovanju.

„Čestitam još jednom učenici Esmi Jaganjac i očekujem da i dalje bude takvih učenika, da se nastavi tradicija pametnih ljudi iz Bosanskog Petrovca“, rekao je načelnik Hujčić.

Učenica, Esma Jaganjac nakon završene Osnovne škole u Bosanskom Petrovcu, svoje je školovanje nastavila u Medicinskoj školi u Bihaću: „Ova me nagrada podstiče na dalje razmišljanje, na dalji uspjeh u životu. Obećavam da ću se i dalje truditi nizati uspjehe. Svoju ću Opčinu predstavljati u najboljem mogućem svjetlu, s obzirom da sam srednju školu upisala u Bihaću“, rekla je Esma Jaganjac, učenica generacije za 2016. godinu Osnovne škole „Ahmet Hromadžić“.



Esma Jaganjac, učenica generacije i načelnik Hujčić

U Domu kulture...

Tatjana Kecman izvela monodramu „10:1“

„Smatram Božijim darom što sam odrasla u Bosanskom Petrovcu, i tu provela jedno prelijepo djetinjstvo“

U Domu kulture, 29. oktobra, građani su mogli uživati u sjajnoj monodrami-komediji „10:1“, glumice Tatjane Kecman koja nije krila svoju sreću što je nakon 40 godina ponovo nastupala u svom rodnom gradu, našem gradu, koji je još jednom dokazao da se u njemu rađaju umjetnici svjetskog kalibra.

„Imam zadovoljstvo da sam nakon 40 godina opet na istoj sceni“... uz osmijeh dodaje: „nemam sto godina, ali oni koji su tada živjeli ovdje možda se sjećaju da sam kao djevojčica od 6-7 godina recitovala pjesmice u Domu kulture, i tad je valjda nekako sve i počelo. Smatram Božijim darom što sam odrasla u Bosanskom Petrovcu, i tu provela jedno prelijepo djetinjstvo“ izjavila je Tatjana za Radio Bosanski Petrovac.

Naime, u pitanju je autorski projekat. Ova predstava se na komičan i ironičan način bavi predrasudama o braku, ženama i muškarcima, a odličan humor i sjajna interakcija sa publikom jesu osnovni kvalitet ove monodrame.

Tatjana svoju komičnu monodramu započinje odabirom jednog muškog člana publike, koji kao dobrovoljac (a možda i ne) igra ulogu budućeg mladoženje. Ona mu obećava da će mu do kraja predstave naći suprugu, tj. da će ga do kraja komada „oženiti“.

Nakon slikovitog ubjeđivanja da su muškarci sposobniji od žena, počinje Tatjanina transformacija u deset različitih žena na temu sklapanja braka, odnosno kakva bi žena bila dobra nekom muškarcu za zajednički život. Tih deset žena, od kojih je svaka zanimljiva na svoj način, su iz svih sfera života našeg društva, od različitog obrazovanja, iz grada i sela, od nametljivih do samozatajnih.

Nevjerovatne transformacije Tatjane Kecman tokom čitavog performansa iako naizgled karikirane, ne gube na prirodnosti i ni u jednom trenutku, malobrojnu bosanskopetrovačku publiku, ne ostavljaju ravnodušnom. Razlog malobrojne posjete je upravo ono što je glumica istakla: „Djeca se ne vaspitavaju u pozorištima, a trebalo bi, nažalost, danas se malo polaže pažnje na kulturu, ali zato postojimo mi, glumci, koji se uvijek dajemo stopostotno, kako za publiku od 15 ljudi, tako i za onu od 400“, završne su riječi Tatjane Kecman prilikom gostovanja na Radiju Bosanski Petrovac.



Tatjana Kecman, nakon 40 godina u bosanskopetrovačkom Domu kulture

-Sa sedam godina započela je karijeru u seriji „Osma ofanziva“; 1990. godine upisala Akademiju scenskih umjetnosti u Sarajevu; 1992. g. nakon kraćeg boravka i rada u Skoplju, upisala fakultet dramskih umjetnosti u Beogradu. Deset godina angažovana u KPGT-u gdje je ostvarila značajne uloge; 1996. g. postala član Saveza dramskih umjetnika Srbije; 2002. g. postavlja na sceni „Kulta“ u Beogradu prvi autorski projekat „Prekobrojna“ i nakon toga ostvaruje više projekata: „Suteren“, „Kentaur“, „Ludilo udvoje“, „Iza scene“,

„10:1“, „Više sreće ovaj put“, „A gde su kokoške“... Sve njene predstave bile su u stalnom repertoaru.

Manifestacija „Dani Skendera Kulenovića“...

Bosanskom Petrovcu monografija „Bosanskopetrovački velikani kulture“

„Bosanski Petrovac je mali, bosanski gradić. Nema rijeku ni željezničku prugu, ali ima svoja polja i zaravni, visoravni i planine. I još nešto ima: ima ljude, sa odlikama gorštačke naravi- plemenite, radine, bistre i oštroomne“

U Domu kulture upriličena je promocija monografije „Bosanskopetrovački velikani kulture“, istaknutog bosanskohercegovačkog autora, Senudina Jašarevića.

Promocija je upriličena u sklopu 18. tradicionalne književne manifestacije „Dani Skendera Kulenovića“, koja se od 7-25. novembra obilježava kako u opštini Bosanski Petrovac, tako i u drugim gradovima Unsko-sanskog kantona.

Promotori ove monografije bile su Vildana Pečenković, univerzitetski profesor bosanskog jezika i književnosti, i Milica Kecman, direktorica bosanskopetrovačkog „Centra za kulturu i obrazovanje“.

„Ova monografija, jednako kao i cijela manifestacija „Dani Skendera Kulenovića“ na neki način zavisi od entuzijazma i volje pojedinca kakav je Senudin Jašarević. Autor je koristio dosadašnja iskustva, naučne studije, kritike kako bi na jednom mjestu objedinio četiri značajna Petrovčana. To su: Skender Kulenović, Jovan Bijelić, Ahmet Hromadžić i Mersad Berber. Ovo zapravo nije naučna studija, klasična monografija, ali je jedna toplja ljudska priča o ljudima koji su ostavili trajan pečat na kulturu Bosanskog Petrovca, Bosne i Hercegovine, ali i šire“, riječi su Vildane Pečenković.

Promociji su prisustvovali profesori, direktorice osnovne i srednje škole, učenici, i ostali predstavnici kulturnog i javnog života opštine Bosanski Petrovac.

Bosanski Petrovac je opština koja se svakim danom trudi da vrati počast i sjećanje na sve one koji su svojim djelom visoko na pijedastal podigli mjesto iz kojeg su ponikli, pa je tako Opština i finansijski podržala štampanje ove monografije.

Senudin Jašarević je kroz ovu monografiju dao svoj doprinos, da na jednom mjestu budu objedinjeni i u svakom domu prisutni bosanskopetrovački velikani: „Imao sam neki osjećaj da ovu monografiju trebam napisati zato što se godinama družim sa Petrovčanima. Ovaj grad ne čine kuće i zgrade, ovaj grad čine ljudi, dobri ljudi.“

Korice monografije oivičene tradicionalnim motivom bosanskopetrovačkog ćilima, „Bolića kolom“ kriju u svom sadržaju pet cjelina, u kojem bosanskopetrovački velikani imaju svoje zasebne.

„Bosanski Petrovac je mali, bosanski gradić. Nema rijeku ni željezničku prugu, ali ima svoja polja i zaravni, visoravni i planine. I još nešto ima: ima ljude, sa odlikama gorštačke naravi- plemenite, radine, bistre i oštroomne.“, riječi su kojima autor završava svoje djelo.

Monografija će se vrlo brzo naći u prodaji, čim se ostvare tehničke mogućnosti za štampanje.



Vildana Pečenović, (prva s lijeva), Senudin Jašarević (autor), Milica Kecman (prva s desna)

Hasanoviću- nagrada „Skender Kulenović“

Dodjelom nagrade „Skender Kulenović“ književniku Nihadu Hasanoviću za roman „Laki pogon“, 9. novembra je završena manifestacija „Dani Skendera Kulenovića“, koja je ove godine obilježena po osamnaesti put.

Nihad Hasanović je bosanskohercegovački pisac rođen u Bihaću. Objavio je drame „Podigni visoko baklju“, „Zaista?“, zbirku priča „Kad su narodi nestali“, romane „O roštilju i raznim smetnjama“, „Čovjek iz podruma“, te priče, pjesme i razne prevode, uglavnom sa francuskog.

Naime, ovogodišnja manifestacija, organizovana je u saradnji sa Udruženjem pisaca Unsko-sanskog kantona, JU Kantonalnom i univerzitetskom bibliotekom, bosanskopetrovačkim Centrom za kulturu i obrazovanje, a svoj doprinos su dali i Mješovita srednja škola „Bosanski Petrovac“ i Osnovna škola „Ahmet Hromadžić“.

Održavanje manifestacije, kao i svake godine, pored Opštine Bosanski Petrovac, finansijski su omogućili i Vlada Unsko-sanskog kantona sa Ministarstvom obrazovanja, nauke, kulture i sporta.

Završnoj manifestaciji prisustvovali su građani, djeca, književnici, i ostali predstavnici kulturnog i javnog života Bosanskog Petrovca.

Na samom početku prisutni su odali posljednju počast preminulom književniku Kemal Coci, dugogodišnjem predsjedniku Udruženja pisaca USK-a, dobitniku književne nagrade „Skender Kulenović“ za 2001. godinu.

U kulturno-umjetničkom programu učestvovala su učenice srednje škole koje su recitovale stihove iz Kulenovićeve zbirke „Ocvale primule“, kao i učenice Umjetničke škole Bihać-Područno, odjeljenje iz Bosanskog Petrovca: Zukančić Nejla i Kebić Sumeja.

Potom je uslijedio najsvečaniji trenutak, proglašenje dobitnika nagrade.

„Ovog puta bilo je zanimljivih knjiga i autora. Na sreću odluka žirija je bila jednoglasna, na prvoj poziciji našao se roman „Laki pogon“ kao najbolji roman autora, koji zaslužuje ovako prestižnu nagradu“, riječi su Huseina Derviševića, predsjednika žirija.

„Sretan sam zbog ove prestižne nagrade, jer nagrada sama po sebi daje veću vidljivost djelu, pa će na taj način privući veću pažnju kako medija, tako i čitalaca“, rekao je Nihad Hasanović.

Značaj ove manifestacije potvrđuje broj književnika koji na njoj učestvuju, kao i broj autora koji svake godine konkurišu za nagradu „Skender Kulenović“, koja je jedna od najznačajnijih koje se dodjeljuju u našoj zemlji, što su potvrdili i sami učesnici manifestacije.



Nihad Hasanović, dobitnik ovogodišnje nagrade „Skender Kulenović“

Posjeta osnovaca i mališana Dječijeg vrtića

Dan štednje u BBI banci

Učiteljice su kazale kako je jako važno da osim teorije, djeca svakodnevno dobivaju i nekakvu vrstu prakse, jer oni najbolje uče na primjerima.

Povodom Svjetskog dana štednje, 31. oktobra učenici trećeg razreda osnovne škole i mališani Dječijeg vrtića posjetili su Bosna Bank International- poslovnicu u našem gradu.

Svjetski dan štednje obilježava se svake godine 31. oktobra. To je dan na koji se prisjećamo davnog 31. oktobra 1924.g. kada su se u Milanu sastali predstavnici svjetskih štednih institucija, u nadi da će pronaći izlaz iz krize koja je nastala kao posljedica prvog svjetskog rata. Na tom skupu istaknuta je važnost štednje za razvoj čovječanstva i važnost borbe protiv svakog oblika rasipništva.

O štednji, odnosno upoznavanju djece sa štednjom vode računava i učiteljice. Tako su učenici, mališani vrtića i učiteljice posjetili BBI banku u našem gradu.

Rukovodilac poslovnice Sanela Družić, nakon što je djecu obradovala prigodnim darovima, upoznala je osnovce i mališane vrtića o značaju i vrijednostima štednje.

“BBI ima za cilj podstaknuti građane na racionalno trošenje i štednju. Naša banka danas je otvorila vrata najmlađima, kako bi se upoznali sa radom banke, ali i kako bi im predstavili vid dječije štednje. Bitno nam je da naučimo naše najmlađe stanovnike kako da od malih nogu nauče štedjeti novac za neke dane kada će im biti potreban, npr. odlazak na ekskurziju, na fakultet...” istakla je gospođa Družić.

Učiteljice su kazale kako je jako važno da osim teorije, djeca svakodnevno dobivaju i nekakvu vrstu prakse, jer oni najbolje uče na primjerima, kako od učitelja tako prije svega od svojih roditelja.

Štednja znači čuvanje vašega novca, istaknuto je na ovom događaju, da bi ga kasnije potrošili za nešto što vam je potrebno. Svi trebaju štedjeti kako bi imali za životne potrebe. Vesela djeca su s puno radosti obećala da će štedjeti i čuvati novac.



Obilježavanje Dana štednje, vrtićki mališani...



...učenici Osnovne škole

“Od kolijevke, pa do groba- najljepše je...”

Dan Osnovne škole „Ahmet Hromadžić“

Svečanim programom, u Domu kulture, 11. oktobra, obilježen je Dan Osnovne škole „Ahmet Hromadžić“.

Program je počeo učeničkim riječima oživljavajući lik i djelo, jednog od petrovačkih velikana, Ahmeta Hromadžića, koji je rođen 11. oktobra i po kome škola ponosno i nosi naziv, i taj dan, učenici su svu svoju kreativnost i ljubav pretočili u tačke koje su vrijedno sa svojim učiteljima pripremili.

Obratila se i direktorica Mujesira Kavaz koja je pozdravila prisutne, zahvalila na odzivu načelniku, kao i nastavnicima-penzionerima, prijašnjim uposlenicima škole koji su svojim dolaskom uveličali radostan dan.

Direktorica nije krila svoje zadovoljstvo činjenicom da ove godine po prvi put pored učenika centralne škole u organizaciji priredbe učestvuju i učenici OŠ „Bravsko“.

Kako samo mogu i znaju djeca, tako su i ove godine obilježili Dan škole, od najmanjih do najvećih svi su dali svoj doprinos.

Umjetnički dio programa otvorio je školski hor koji je otpjevao pjesmu „Prijatelji“. Nakon toga publiku su nasmijale učenice Nikolina i Katarina dijelom komedije „Jazavac pred sudom“.

Došao je red i da učenici nastupe kolažnom tačkom u sklopu koje su recitovali, igrali, pjevali, te su nakon njih učenici trećeg razred izveli igrokaz „Škola“ u kojem su nošeni na krilima kreativnosti publici poručili da je škola osim „briga“ i radost velika.

Prijateljevanje uz pjesmu, ples, recitaciju i igru još jednom je ostavilo potpis na izreku: „ Od kolijevke, pa do groba-najljepše je đaćko doba“.

Učenici petog razreda izveli su tačke: „Nebo i planete“ i „Au što je škola zgodna“.

Da knjige imaju dušu, da vide, osjećaju, igrokazom „Od korice do police“ svoju su kreativnost pokazali učenici područne škole „Bravsko“.

Povodom Dana učitelja, koji je obilježen 5. oktobra učenici su još jednom stihovima čestitali i pokazali nastavnicima da zauzimaju posebno mjesto kod svakog učenika.

Program je zatvoren veselom tačkom ritmičke sekcije, kojom su učenice pokazale svoje sposobnosti, vještine i ljubav prema plesu, uz pjesmu Dženifer Lopez.



Komedija "Jazavac pred sudom" u izvođenju učenica Nikoline i Katarine



Recitacija, pjesma...



Učenici uz ples pokazuju svoju kreativnost



Učenici područne škole Bravsko i igrokaz "Od korice do police"

Bosanskopetrovački srednjoškolci obilježili Međunarodni dan srednjoškolaca i studenata

Učenici Mješovite srednje škole „Bosanski Petrovac“, 17. novembra su svečanim defileom kroz grad i minutom šutnje na Trgu šehida, obilježili Međunarodni dan srednjoškolaca i studenata.

Međunarodni dan srednjoškolaca i studenata posvećen je uspomeni na praške studente i srednjoškolce koji su zbog mirnog protesta protiv nacističke okupacije svoje zemlje, održanog 17. novembra 1939. godine strijeljani bez suđenja.

„U sjećanje na strijeljane praške studente i srednjoškolce mi smo danas izveli jedan defile, ili šetnju gradom kako bi, kao srednjoškolci, dali svoj doprinos ovom vrlo bitnom datumu“, rekla je Džejlana Mehić, predsjednica Vijeća učenika Mješovite srednje škole „Bosanski Petrovac“.

Inače, Međunarodni dan srednjoškolaca obilježava se širom Bosne i Hercegovine. Na ovaj dan, predstavlja se važnost srednjoškolaca, kao budućih nosilaca kompletnog društva.



Povorka srednjoškolaca ka centru grada

Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

Slušajte Radio Bosanski
Petrovac od 15:00-17:00,
svakim danom na 90.9 MHz fm